

續
碑
傳
集



續碑傳集卷二十七

江陰繆荃孫纂錄

同治朝督撫

廣東巡撫調署廣西巡撫李公神道碑

方濬頤

封疆大吏以縣令起家者習知民間疾苦地方利害與夫僚屬之賢否政令賞罰之是非得失一旦提綱挈領鼓舞而振興之則如樹表見景操縵成聲往往事半功倍不勞而理焉濬頤承乏監司十餘稔所見者惟山左李公其庶幾乎公與濬頤道光甲辰同成進士同出倉少平師之門同官嶺南顧其先乙未公舉於鄉濬頤則僅中副車迨釋褐登朝濬頤倖登詞館而公則捧檄於外濬頤觀察南部時公猶權廣州守會幾何時公由都轉而臬而藩洊躋開府先治八閩幾撫兩粵而濬頤則依然以老鹽官自粵之淮不幸於邗溝舟次哭公之喪傷何如也嗚呼公下世已六年矣適公友嘉興陳君蔣松欲還浙濬頤延之入幕暇輒與公談往事咨嗟不已曩未見公狀陳君乃發篋出畧重感齊年交且相隨幾十稔謹次公生平書於麗牲之碑而爲之銘曰公諱福泰字星衢濟甯州人高祖學孔以貢生教授鄉里曾祖浩祖萬松皆有隱德

考崐砥行力學慷慨持大節里人咸服之四代以公貴皆

贈如公官妣張太夫人生子二公齒居長年弱冠補弟子員迨成進士以知縣分發廣東粵俗號難治贈公訓之曰地方官患不清正清則人畏正則人服畏且服彼粵民方效順輸誠之不暇何强悍之足云厯知饒平潮陽番禺三縣事爲政以安良除暴爲先粵中風氣大都匪強紳弱公毅然扶正抑邪力去吾民之害遇械鬪案則必緝正凶誅首惡然後審兩造之曲直而持平以斷案無留牘宰三邑皆然人心悅服公又以粵民趨利而不知有義欲端民風首在正士習每見士子輒諄諄於義利之辨勸之以敦品勵行一時爭自濯磨蒸爲善俗上僚咸重之咸豐四年五月東莞會匪何六倡亂於石隆東莞故有巡船素稱敢戰縣令馭之非法遂叛而投何六陷東莞距廣州僅一日程省垣震動公時宰番禺稔知省河巡船與東莞巡船有隙屢在外洋私鬪以之擊賊必得力且不煩征調請於當道從之連戰皆捷七日而復東莞夏杪會匪復四起西則陳開踞佛山鎮北則甘先踞佛嶺市南則陳光滙陳險涼踞沙灣茭塘各擁眾十餘萬窺伺省垣惟東南鹿步司一路可通薪米入城而其地向有土匪甘陳諸逆嗾之相應遂成合圍之勢先是有爭

水互鬪案旋息旋鬪者廿年公親至其鄉開誠勸導集紳衿耆老爲之
理處民皆罷鬪感公恩恆思效命至是公乃設局於城外東山寺曉以
大義僉曰如公約一鄉通賊眾鄉擊之以孝廉馬汝泉主其事期於每
月朔望會集以聯官民之氣人心大定賊恚甚急攻之並屯大隊於南
海神廟均爲鄉團擊走東道不梗轉輸相繼卒得成功甘先之踞佛嶺
市也鄉民從之賊張甚我軍屢挫公招北路紳士之避亂居城者告之
曰賊固烏合焉能成事若子弟多聞從逆事平皆族矣諸紳愕然問所
以治全之策公曰逼脅爲逆許以自新其速傳諭子弟回鄉勿助賊由
官給以保甲牌先回鄉者註明於牌他日入村收捕凡牌內有名者皆
勿殺眾唯唯而賊勢瓦解我軍克其巢甘先竄湖南復爲楚軍所敗率
殘賊三千餘折回鴉湖公以三千人屯慕德里大府以鴉湖匪多且罪
魁必盡殺公力持不可大府怒嚴斥之同事者咸惴惴勸公變計公仍
持前議謂各鄉之不肯應賊者以先有逼脅勿殺之言也今若食言鴉
湖縱無足惜脫數百村反側各路逆酋又從而煽之是堅其從逆之心
而驅之使合己不遵功令罪也遵之而變生罪更大不待再計矣徑召
紳耆復申前約予限捕賊無不歡呼用命計先後縛送逆犯三千餘名

獲甘先寘之法北路肅清鴉湖丁壯萬人胥賴公一言全活化互鄉爲仁里焉六年洋人申入城之請當道拒之因而構釁九月二十五日洋船闌入省河攻外城破十餘丈公以米糴實泥沙塞其缺礮不能入退營海珠臺以開花巨礮向城轟擊晝夜鼎沸公請於大府募敢戰士四百人駕小艇夜擊之臺高艇低臺上之礮不能及艇而我艇小礮向臺擊之無不中者十二月二十三日夜我軍出隊連環轟擊三時之久直抵臺東勇目關龍率十餘人攘臂先登洋人乃由臺西遁去翌日洋船退出省河民居安堵是役也官弁出入火光中兩月有餘公常駕小艇督戰礮數及於頂絕無所傷七年西北兩江有事兵勇紛紛遣調省中惟林福盛勇九百屯北郭外鄧安邦勇七百屯東郭外官紳議曰外洋兵退已久可以議和太府不聽伍某又請勿令入城祇於城外設公所公使來則督撫出城見之提督來則司道出城見之領事來則守令出城見之不聽十一月英法兩國合師來犯請增兵不許請調鄉團不許十三日黎明以大礮轟城步隊六千撲東門鄧勇七百禦之戰甚力自卯至午傷亡過半不退二更入見大府許以撫軍兵八百助戰十四日兵未出而英人已蟻附登陴紳士請議和汔無成說公乃與南海令

華廷傑潛約王太常映斗許太史其光林觀察福盛梁孝廉葆訓號召鄉團爲規復計初六日會於石井之蓼采鄉各路來會者數百人是日定議開局於石井傳檄省外十二縣諸大紳皆許之卒以和議格不行八年粵賊石達開由閩竄陷嘉應圍興甯總督某調卓興一軍赴援自駐龍川督師卓軍解興甯圍賊棄嘉應趨船塘墟去龍川八十里謀報賊欲犯惠州前廣西按察使張某請制府迅返惠州以顧根本公進言我軍雖單而賊蹤靡定應伺其動而疾擊之若大軍遽回惠州軍心一搖不可復振賊大股踵至何以禦之乃止同治三年僞侍王李世賢由江右撲南雄時公已擢廉訪大府奏請以公督辦東北兩江軍務賊攻南雄不克沿粵邊入閩襲武平永定公督各軍擊破之先後收復兩城賞戴花翎四年正月奉

旨馳赴潮州督辦潮防尋擢粵藩仍治軍事公以嘉應相去數百里力難兼顧請派員分辦嘉防大府不許二月行抵三河壩賊酋丁太陽全股下竄扼之於楓朗賊竄平和進陷詔安乃以鄧勇三千營黃岡之分水關禦詔安賊連戰皆捷賊回竄永定詔安下潮防以固而康逆與林逆兩股已由上杭之大沽灘渡河入嘉應界公由潮抵嘉應堅守州城

卻之公旋因事交浙閩總督今湘陰相國查辦奉

旨以道員降補賊襲嘉應陷之公聞警往援省餉久斷諸軍奔馳窮谷中掘薯而食冬無棉衣朔風栗冽死亡相繼無退志亦無怨言相國移師松口嘉應復粵賊盪平五年正月至松口謁相國令籌策善後事宜初咸豐七年冬贈公卒於家大府奏請奪情留粵遷延十稔公以軍務竣請假回籍補制行有日矣尋奉旨馳赴潮州辦理中外交涉事宜是年秋復補粵藩十一月拜福建巡撫之

命由粵入閩途中商民環訴抽釐兩起兩驗共抽四次民不堪命下車之始首議減釐二層商民稱便劾福州延平兩郡守吏治肅然兵燹後田畝荒蕪賦額久絀前撫臣奏請清理田賦糧戶慮追舊欠復業者鮮公請以墾復之年起征舊欠悉予豁免於是逃亡者陸續歸業冬調撫廣東公籲懇入

覲並申重補制之請奉

旨俞允八年入都

陛見後卽回籍持服百日航海抵粵公以粵東風氣漸歸樸厚獨潮州

九屬強橫如昔歷任有司寬嚴未得其當又罕能廉潔自矢以爲民表率者因偕制府瑞麟公奏派方總兵耀及候補道沈映鈴吳贊誠督率弁兵周歷各邑村莊清釐化導手訂章程八條曰別良莠曰禁需索曰絕械鬪曰散鄉會曰查私抽曰清田畝曰明賞罰曰許自新諄諭官紳實力辦理牧令則簡廉能者撫字催科並行不悖甫及二載閭閻靜謐比戶可封於是

朝廷百十萬正供輸將恐後而水陸諸軍待支餉精補發無虧說者謂藍鹿州治潮普兩邑未能如今日布化之速也九年冬調署廣西巡撫公母張太夫人年已八十有三灘河險阻艱於就養公命冢孫世昌侍太夫人居廣州公抵桂林整飭邊防翦除伏莽減商釐以甦民困裕餉糴以固軍心昕夕講求不遺餘力蓋無異於當日之治廣管也十年三月二十六日薨於位享壽六十有五公原配楊夫人先卒繼配朱夫人咸豐七年洋人入城之變夫人在番禺縣署聞民間譌言投繯殉難請旌於朝遙室張恭人孔孺人子五家麟候補員外郎楊夫人出先公卒家桂家鳳朱夫人出均殤家玉候選主事加員外郎銜家蘭皆張恭人出女五長適孫次適張三適郭皆朱夫人出四字孫五未字皆張恭人

出孫一世昌孫女二均家麟出公以某年月日葬某銘曰

我筦禺筴步公之後百無一能鉞規是守公治軍旅我攝公篆竭蹶將事不匱輸轉公之服官廿有八年奔馳戎馬遭際連邗公向我言援枹痛哭一著棋輸致壞全局不戰不守身爲國辱鯨鯢沸波至今流毒我服公量汪汪若海我服公行平平如砥我服公才恢恢有餘我服公功謙謙不居名聞

九重多薦公者蹶而復起公心彌下公之愛民自始至終公之律己有約無豐同譜一人公掌封圻老母在堂驂鸞奚歸前李後朱望垂東粵公也繼之民無異說惜乎暮年乃秉節鉞千秋萬歲請觀此碣

太子少保東河總督喬公墓志銘

方濬頤

濬頤曩在京師因李子皆太守得交於公時公官工部政最簡春秋佳日輒就子皆與予爲文字飲坦夷和易脫略形骸並識濬泉溥泉兩丈而亡弟子健來應京兆試亦獲交於公及公典郡擢監司洊躋開府三十年中望尊位顯獨於春明故舊念念弗忘遠道馳書歲時不絕手自作牋情詞肫懇于健殉丹陽之難荷公疏聞於

朝俾邀

賜卹尤感大德迫潯頤量移兩淮適公養痾海陵拏舟過訪驩然道故
自是通問更密公再出山相去太遠尺一往還仍如疇曩乃光緒初元
遽聞惡耗中懷悲悼不能自己公之扶危定傾布澤行惠大江南北萬
口同聲稱道勿衰公與潯頤同庚表揚勳烈傳示來茲固後死者之責
也謹詮次事蹟爲文以埋諸幽公姓喬氏諱松年字健侯號鶴齋山西
徐溝人曾祖玠祖人傑湖北按察使有捕盜救荒治河諸大政書傳於
世乾隆五十八年英國入貢道天津廉訪公時爲觀察宣布
朝廷威德饋遺悉卻之英人敬公馴服盡禮而去嘉慶中英人猶有慕
名求見者而公已歸道山矣父邦憲刑科給事中本生父邦哲直隸遵
化州知州三代皆以公貴
贈榮祿大夫振威將軍妣皆一品夫人公幼穎悟資秉過人道光甲午
乙未聯捷成進士年甫十九以主事籤分工部補鉛子庫主事升都水
司員外咸豐元年典試湖南得人爲盛遷屯田司郎中截取知府揀發
江蘇先權常州未幾調署蘇州時粵寇張甚潮勇潛通上海賊酋劉麗
川圖不軌公偵知之自上官誅其爲首者而人心以定會上海七營兵
潰沿途劫掠金閭戒嚴城晝閉公由水關出撫循其眾安堵如故尋補

松江府知府兼攝蘇松太道佐巡撫吉爾杭阿公治軍出奇制勝克復上海改署常鎮通海道旋即眞除丁父憂吉公規復鎮江奏請奪情檄辦營務公之初至常州也設保衛總局嚴詰姦宄屢有所獲如守蘇時吉公師燬身殉潰兵之患甚於上海公亟白當道撥餉十萬赴新豐鎮招逃亡歸伍散給口糧堅請總督怡良公移師丹陽以固門戶有土匪受賊指者立禽爲首之姜方槐等十八人寘之法餘勿問是年復大旱則請免抽米釐與商販護票諄勸富者輸將凡振濟六次全活甚眾鎮江旣復公仍兼理營務處請設官銀局行鈔票法民皆稱便嗣兼權兩淮鹽運使行假道法淮鹽由東壩運銷輸課尋丁降服憂大府倚公再請奪情由是

朝廷知公才擢公運使當是時兩淮引地不通商販四散司庫如洗公移駐泰州設法招徠每年得課數十萬以濟餉精擢江甯布政使筦江北糧臺轉輸不匱威愛兼施消薛成良之患於未萌揚之人汔今猶能道之庚申江南大營潰長江水師枵腹而譁公與各將領約片帆勿渡暫由北臺協濟並令沿江民團聯絡聲勢以助水師江北因之無恐江南避難士民紛紛渡江土人利其輜重卽戕之公於泰靖各港口設巡

船防竄賊渡難民并於泰州設局收養病者施藥沒者施棺行者予貲
居者予食事平之日資送回籍故常鎮之人僉曰公父我母我也同治
二年擢安徽巡撫苗逆初平擒匪尙橫任柱張總愚等竄突楚豫以蒙
毫爲老巢公由臨淮進扼壽州外櫻巨寇內靖土匪三年冬任張捻眾
十餘萬回窺霍山公檄諸軍隨僧忠王大兵蹙之於英霍之交斬其渠
魁解散黨羽幾十萬逆黨姚紹采徐廣山輩投誠陰謀乘便公不動聲
色捕而殲旃又以雉河集爲捻之老巢議於其地建渦陽縣並建龍山
營於宿之龍山集移鳳臺縣治於下蔡又以皖北幅幘遼闊廬鳳須道
治不及議分設安廬道於省垣奏入皆

報可六安霍邱之王稀毛猴王庭用爲著名巨憝公又盡禽斬之於是
商賈漸集釐稅日充軍餉以裕公旣除道梗復慮田荒乃買耕牛市穀
種分給鄉農俾資生聚其流民來歸者資遣之與駐泰州日無異四年
淮水漲溢壽州城不沒者三板百姓露處高阜磬磬待斃公廣備糗糧
汎舟以振十餘萬眾得慶再生軍書旁午文教不興修復書院以逆產
充公爲久遠計又與治常州日無異皖省稅則本輕顧以規費日增上
下所需取給於此故浮收之數有數倍於正額者且有私收折價至十

數倍者公重加釐定秦明通省暫征折色除解部定價外酌留羨餘以濟公用而陋規盡數刪除民受其福公亦不至重累十餘年官民相安從無一征漕滋事之案蓋瘡痍未復公之所以培養之者深也五年調撫陝西出壽州士民送者相望於道時張總愚擁悍黨西趨橫互於華渭之閒公輕車由蒲渡河取道同朝入境後卽率師渡渭營渭南以守爲戰師未至賊已越渭長驅而入公亟由閒道入省嚴備以待無何陝軍潰於灞橋賊直薄省垣隴回亦踵至城中無一可恃之兵人情洶洶公激厲疲卒登陴固守招集散亡以圖復振奏調劉松山郭寶昌兩軍入秦連敗賊於咸陽岐山富平朝邑捻不得休息與回再合一年之中捻未能挾回以窺河東繁公之力也又以西同鳳所轄地勢平衍力申堅壁清野之議令大小鄉均築堡以守厥後湘陰相國統師廓清隴右公實有預爲之謀者體本羸弱頻年籌兵籌餉心力卒瘁七年春移疾得

請僑居秦州閉門著述繼配劉夫人工書畫雅有唱隨之樂八年劉夫人卒公子然一身惟思報國九年北上復拜倉場總督之

命十年遷東河總督公統籌全局周歷履勘議築隄東水順黃北趨入海爲一勞永逸計惜不果行盛暑嚴寒宣防河次因復積勞成疾十三年十二月聞

穆宗毅皇帝升遐呼號欲絕光緒初元正月奉頒

遺詔哭臨禮成嗚咽過甚昏眩不起掖之入內遂臥床絕粒以二月十四日薨享年六十有一遺疏上聞

九重震悼贈太子少保公無嗣繼弟之子聯寶爲後聯寶甫九歲

恩賞主事公手不釋卷其已刊者爲摩蘿亭札記未梓者緯牘數十卷

暨詩古文辭藏於家接見僚屬雖炎暑必衣冠危坐不揮箠何東洲太

史贈句云裘帶輕溫羊叔子衣冠樸野衛文公蓋紀實也在軍治軍書

一目數十行夜分始寢暇與賓僚討論往事講求利弊孳孳不倦其御

將佐則解衣推食如家人父子而處變決疑當機立斷雷霆迅發莫可

端倪待親故不少吝而不可干以私恢宏好結納而不周旋當路清風

亮節卓然可傳於世公薨之後皖紳請於臨淮壽州各建專祠大府入

告

從之昨又聞常州紳士請入祀名宦祠公之遺愛在民信而有徵非予

一人之私言也某年某月某日葬某銘曰

我初交公兮公則了不異人公之出而典郡兮乃遭際夫邐迤既福三
吳兮又福吾皖建牙樹纛兮經綸大展公爲名臣兮又爲通儒公不驕
人兮中抑抑而外愉愉公所造就兮皆美材狀公生平兮簡而該何以
報公兮曰報公以文字濡禿管兮揮老淚迢迢佳城阻南北兮我思執
紼嗟未得兮如公有幾

三朝宣力兮千秋不朽俾貞珉之是勒兮

湖南巡撫惲公墓表

湯紀尚

陽湖惲氏以節義文章望江左勝國時遜菴傳蕺山學以貞隱終香山
南田諸老蟬蛻鴻蜚渟息天地洎嘉慶朝子居先生以著述匯一之而
祇遜紹衣趾美益篤者有若中丞公公子居先生從子也名世臨字次
山曾祖士燠妣錢祖輪妣鄧父敷乾隆甲寅舉人仕浙江海甯知州有
惠政祀名宦妣張梁以公貴

贈封如例公以廉吏子食貧劬學孤清俊立矯然流俗外道光癸卯舉
京兆乙巳成進士入翰林散館改主事觀政吏部累轉郎中記名御史
掌山西道監察御史京察一等授湖南長沙遺缺知府補常德擢岳常

豐道特晉布政使旋奉

命巡撫湖南未幾被誣落職沒後復原階祀名宦公仕宦數十年計必達至微慮必極至遠持成格以繩崎嶇之情援古誼以削夸毗之習軒車所泣必嶄嶄有以自祿皆古勞臣所必爲者在吏部日捐例碎細爲奸利藪公听宵治檔冊勤職不劾吏憚其廉泊入諫垣謇諤不阿西南夷顯顯互市要挾萬端疏兩上悉

嘉納公內嫺朝廷掌故外諳郡國利病於是朝野望大用而公果由郡守不次遷秩五載而開府焉公之守常德也綜核名實痛革宿習蘇枯振憊相濡以仁老奸宿賊聞聲栗魄時粵寇蹂躪寶慶郡境牙錯饒闕兵單譌言雷動公選勁旅以扼奧區設礮船以截要隘亂遂定郡濱沅水盛漲飛走路絕西門花苗隄控巨浸勢垂壞公晝夜督畚箠再竭再潰水沒蹀眾色然駭請休公曰吾與隄存亡矣咸奮築隄完民以安其銳身爲民謀類此

本朝布政使以牧伯而筦度支軍興後沿江壁壘軍需一資於湖南東征協饒巨萬紳主出納而官不問誰何公受任司庫移交銀千兩而短輸六十萬公爬梳簿領釐剔陋規以贏縮相劑節銀三十萬又哀所謂

水錢者亦巨萬終公任支解裕如是時曾公國荃翔師於金陵以一軍
擣雨花臺逆酋李秀成盡銳稀突我軍鉛藥垂盡公立以三十萬斤增
夷艚以東七日而達金陵大功成有擬陳公勞者公婉謝之未幾有巡
撫湖南之

命公任巡撫如治郡降逆賊李幅猷禽黔寇曹元興亭徹宴然專意吏
治以儒術鐫摩之儲積穀杜浮收剔訟蠹飭官方端士習擴學舍民俗
丕革愉頌際百蠻湘人士推公治行擬之趙恭毅陸中丞之倫而羣蜚
刺天遂不安於位矣初公守常德時苦粵警饋給不支集紳商議每鹽
斤增稅錢二濟軍實牘請後行出納紳筦之郡賴以靖至是公爲巡撫
當奏署布政使越次用糧儲道按察使某不能無望請病去言官某撫
雜事入告使臣推問無左驗乃以鹽釐事實之擬上鐫級去官公躬躬
引咎不欲以辨得直一時湘中士大夫翕然推之爲治裝歸焉公爲治
明習文法吏例察下控覈而鉤稽必責其實其撫湘陽同好惡於人而
內實耿介視苟且之政蹙然若叢垢被體者晚居吳下獨居深念猶時
爲國規久遠大臣先後薦達
朝廷亦鑒公忱而公顧不獲延寒暑以待眾論皎然之日俾貞觀勇忠